

Na iTaube Caliva

A vinakata ga o Carolina me maroroya tale vakalailai na itaube.



Mai vei Carolina Marín
(Yavutaki ena italanoa dina)

Na italanoa oqo a yaco e Argentina.

Alakova yani vakatotolo na lomanibai o Carolina. E a tiko e tautuba na nona itokani o Isabella.

E a yaloyalo mai o Isabella. "Mai qito!"

A takosova o Carolina na lomanibai ki na vale nei Isabella.

Sa tatara ki nona taga o Isabella. "Au vinakata me'u vakaraitaka vei iko e dua na ka," a kaya o koya. Sa qai ucuna mai o koya na itaube totoka

duadua se qai bau raica o Carolina! E ra a caliva ka ramase na kena veivatu talei.

"E nei noqu mamá," a kaya o Isabella. "E kaya o koya ni rawa ni'u qitotaka nikua. Raica ena rarama ni siga."

E a dulaka cake o Isabella na itaube ki na rarama. E drau na drodrolagi era a viritaki mai na vatu talei. A sa totoka dina!

"Daru qitotaka mada na vuni kei na vakasaqara!" A kaya o Isabella.

"Sa donu," a kaya o Carolina. "Au rawa ni veivuke me taqomaki vinaka na itaube."

"Vinaka vakalevu!" A solia o Isabella vei Carolina na itaube, ka biuta sara o Carolina ki na nona taga.

Sega ni dede sa yaco mai na gauna me lako kina i vale o Carolina. Ni vakamoce o koya, a sega ni taroga o Isabella na itaube. E rairai a guilecava. Ka sega ni vakananuma vua o Carolina.

E a ca vakalailai na loma i Carolina ena nona kauta na itaube ki vale. Ia a vinakata o koya me tiko mada ga vua vakalailai tale. A sega ni kauwaitaka o koya na ca ni lomana ka biuta na itaube e ruku ni nona ilokoloko.

Na siga e tarava a Siga Vakarauwai. A cakava na nona cakacaka o Carolina ka lako i tuba me laki qito. Sa guilecava vakadua o koya na itaube.

"Carolina!" A kaci o Papá. E rawa ni o lako mada mai?" E a cici yani i loma o Carolina. "Io?"

A taura tu o Papá na itaube e ligana. "A kunea o Mamá ena ruku ni nomu ilokoloko na ka oqo. E nei cei beka?"

"E nei Isabella." E a tonawanawa na wainimata i Carolina. "Au a maroroya vinaka tiko ena noqu taga ni keirau qito tiko ena noa. Ia au a mani lewa me'u kauta i vale."

A dabe sobu o Mamá vata kei Carolina e na idabedabe. "Vinaka vakalevu na tukuna na dina. "Na cava o nanuma ni dodonu mo cakava qo?"

E a galu o Carolina. A vakasamataki Jisu. Ena vinakata o Koya vei au me'u lomadina ka vakasuka na itaube.

"E dodonu me'u solia lesu vei Isabella ka tukuna vua ni'u cala," a kaya o Carolina. Ena gauna ga e kaya kina, a yali sara na ca ni lomana. A vakila na katakata e lomana.

A gole o Carolina ki na vale nei Isabella.

"Bula," a kaya o Carolina. A solia vei Isabella na itaube. "Vosoti au ni'u a maroroya tiko. E rawa beka ni ko na vosoti au?"

"Io" a kaya o Isabella. "Vinaka vakalevu nomu kauta lesu mai." A qai matadrede o koya. "O via qitotaka tale na vuni kei na vakasaqara?"

"Io! Mo wiliwili iliu—au na laki vuni!"

Ena bogi oya, a cabora o Carolina e dua

na masu. "Tamaqu Vakalomalagi lomani, yalovinaka ni vosoti au ni'u a taura tiko na itaube. Vinaka vakalevu na nomuni vukei au me'u vakadodonutaka."

A vakila tale o Carolina na katakata e lomana. A marau o koya ni rawa ni cakava na veika e vinakata vua o Jisu me cakava. ●

AU RAWA NI VEIVUTUNI

Eda dau digidigi cala kece ena so na gauna. Ia ena vuku i Jisu Karisito kei na Nona Veisorovaki, eda rawa ni veisau ka cakava na ka me vakadodonutaki. Qo e vakatokai na veivutuni. Ni da veivutuni, eda kere veivosoti vei ira eda vakararawataki ira. Eda tovolea me da vakavinakataka na cala. Eda masuta na veivosoti. Eda cakava na noda vinaka taucoko meda kakua ni cakava tale na digidigi cala o ya. Eda na qai rawa ni vosoti ka vakila na vakacegu mai vua na Tamada Vakalomalagi.

